

Xujun xi kits'inkjihí nda postru Pablu Filemon

B'í ts'ín kikjaniñaha Pablu Filemon

¹An Pablu kjíiya'yán ngat'aha Cristo Jesu. An ko nda nts'eé Timoteo tísuniñaihí nda Filemon. Tjo nkjúnna ji. Ji xi ta tín'exát'aihi Cristo. ²Tísuniña yaihi nichjaá Apiá, ko nda nts'eé Arkipo xi ta tít'sín nga'yún ngat'aha Cristo, ko xuta ninku xi ma ñjakú ni'yahi.

³Kas'enuu kjuanda ko kjuajyu xi tsjáná Ntia Na'miná ko Nda Ntíaná Jesucristo.

B'í ts'ín kitsúya Pablu xi nkú ts'ín nchjantjai Filemon

⁴F'áítsjenna ji nk'ie nga nchjaka Ntíaná. Tehente tsja máb'achjihí ⁵nga tí'miyana xi nkú ts'ín tjohi ngayjee xuta xi Ntíaná kits'ín ts'e ko xi nkú ts'ín n'e s'ejin Nda Ntíaná Jesu.

⁶Bankihí Ntíaná nga xi nkú ts'ín n'e s'ejin ni xi ngujuhín n'e s'ejián, kui xi kats'ínxájin kjuankjintak'uhin tu xi b'a ts'ín kamankjihin ri ngayjee ni nda xi tjínná ngat'aha Cristo Jesu. ⁷Tsjo nkjún tjínna ko sakúna nga'yún ngat'aha xi nkú ts'ín tjohi xuta ninku. At'aha ngat'ahi, nda nts'é, kisakú nga'yúhun animaha xuta xi ts'e Ntíaná.

B'í ts'ín nchjantjai Pablu Onesimo

⁸Kui b'a maha, ndaha tsa ngajoho Cristo kama kuinchjako masen masehen ni xi tjíhin nga n'ei, ⁹tunga tu sa ní t'bankihi ni xi xíhin at'aha tjoná xinkjá. An Pablu xi ja kama chá ko kjíiya'yán nd'ai tu ngat'aha Cristo Jesu ¹⁰t'bankihi nku kjuanda ngat'a ts'e Onesimo. Kui xi ja tsichu ma xi nkú joyaha tsa ntína ei aya nubayóo. ¹¹Kui xi najmi kamachjéhin nistjin nk'ie tunga nd'ai ji ko an machénná ndo.

¹²Tít's'inkjise ngáhara. N'ekjáíhin xi nkúhu tsa an niu. ¹³Mjena nga k'úéjñako sana ei tsakai tu xi ngajohi ts'ínxát'ahana ei má nga kjíiya'yán tu ngat'aha én nda tsuhu Nda Ntíaná. ¹⁴Tunga ndahá nku ni najmi mjena chuba ts'ian tsa najmi tjínkuhu tak'uin, tu xi animahi nibaha ra kjuanda xi n'ení ko najmi an ts'in kjua'yúhunra.

¹⁵Kutsa kuihí kjuaha ngji t'axíhin ri Onesimo chuba nistjin, tu xi n'ekjáiín sín ngáha ri nd'ai. ¹⁶Tunga najmi ta xi nkúhú ni tsa nku nda

musu xi kich'atsei chasehí. Tu sa ní chasehí xi nkúhu nku nda xi 'yún chjí saha ra nga nku nda musu. Ngat'a ts'an ndats'é ja tsichu ma ndo ko tjona. Ngat'a ts'i 'yún chjí saha ra ndo, at'aha ta ts'ínxát'a ngáha ri ko ta s'ejihín Nda Ntíaná xi nkúhu ji.

¹⁷Kui b'a maha, xihí yaní nga nkuhú tinchajían ni xi ngujihín s'ejinná, n'ekjáiín ngáha ri Onesimo xi nkúhu tsa an niu. ¹⁸Tsa tjin má najmi nda kits'ínkóhi ko tsa tjin ni xi tjeheñ ts'i, kuentana t'et'ai niu. ¹⁹An k'uechjá ni xi tjeheñ. An Pablo ntuna t'ib'et'áhana xujuin nga b'a ts'ian, ndaha tsa kama ts'inkj'áitsjehen ni xi tjehin ts'an. Ngat'ana tinchihinni. ²⁰Ji nda nts'e, at'aha t'johi Nda Ntíaná, kasakújinna ji nku kjuanda. Tjen nga'yíhín animana tu ngat'aha nga nkuhú kich'aá Cristo.

²¹B'a ts'ín t'ib'et'áha at'aha behe k'an nga kúinú'yá'éní. Be nga 'yún n'etjusun sai ni xi t'bankihi. ²²Ko ta t'bankihi kj'ái sa ni. T'endaní nku ante ni'yahi, at'aha t'binchihuu Ntíaná nga kama kfínsenuu. Tu t'ikuyáha ra nga b'a kama.

B'i ts'ín kits'ínkje Pablo xujuin

²³Títs'ínkjihí kjuasuniña nda Epafra. Eí ta kjiya'yúnkona ngat'aha Cristo Jesu. ²⁴Ko ta títs'ínkjihí kjuasuniña nda Marko, nda Aristarko, nda Dema ko nda Luko. Kui jái ta y'anjikona xá xi títs'ian.

²⁵Kjuandaha Nda Ntíaná Jesucristo kas'eyaha animanuu.